

JA MYĪDU'UKPI NØKY MIDI JA PABLO TYANĪGAJX JA TESALÓNİKĪT JAA'Y

Ku ja Pablo tnijayi pøn ja nwindson'ajtim tjanchja'widip

¹ Pablo ø nxøøw, jøts øø yam nguejxpy ja nøky møøt ja Silvano jøts møøt ja Timoteo, jøts øøts ja ndaniguexy pøn jaty tjanchja'widip ja Jesucristo yja' jam Tesalónica kajpkøjxp, pøn møøt amumjoojt t'etti ja Dios Teety jøts møøt ja nwindson'ajtim Jesucristo. Nay ja'ats amuum mgunuu'kxiðip jøts ja jotkujk'ajtin mmo'ojidit møøt ja nwindson'ajtim Jesucristo.

Ku ja Tesalónikit jaa'y tyiktaañ ja ejxpajt sa ja Diosyikjanchjawi

² Ejtp øøts ja Dios ndukmøjawi ndukunuu'kxyjawi ku meets ja xjanchjawi, jøts ku øøts ja Dios n'ajot'aty ejtp mee nja'myech. ³ Ku mee ngajpxpaaty ku øøts ja Dios n'ajot'aty ka'ap øøts ja nja'dyigøy ja m'øy'ajtindi, sa ja tsojkin ja pa'ayo'owin xmøøt'atti, jøts sa ja ajot'ajtin møk'ampy xjagyapti jøts xjøp'ejxti ku mye'ent jadigojk ja nwindson'ajtim Jesucristo. ⁴ Meets migu'uktøjkti, pøn jaty ja Dios janchja'widip, Dios mee mdsojkip jøts nay ja' tø mwi'ijxyidi jøts mee mnitso'ok'att. ⁵ Jade'en'ampy øøts nnijawi ku øøts jam ojts ja Dios y'øgyajpxy ja y'ømyadya'aky ngajpxwa'kxiyi mā meets jam, kidi øødsip ja ojts

jade'en nugo ngajpxy, pø jamxi ja Espíritu Santo ja myøk'ajtín ja tmøødiyí jøts ja jade'en wa'ats yikniǰawit jøts ku ja'abi kajpxy jøts ku ja'abi ayuujk tyiyí yjanchi. Wa'atsxi xnijawidi jøts ku øøts ja nduun, kidi øødsip ja kø'øm nadyamíduujnip pø ja'agøjpxi øøts ja nduñ jøts meets ja xyiktu'unt.

⁶ Ja Espíritu Santots mee mmøøjyip ja xyondaajkin jøts meets ejtni xoni xkupøkti ja Dios y'øgyajpxy ja Dios y'ømyadya'aky øy meets ja kawine'en tø xkuwanjati. Xjats meets nayide'en xuñ sa tø xpa'ejxti ku øøts ja ayo'on nmídaní midí ja nwindson'ajtim tø ttunjøpi. ⁷ Xjats jade'en tø mbidsømdi jøts ejxpajt mwa'andi jøts ja mni'ejxu'udyidi níduki'iyí pøn jaty ja Dios tjanchja'widip, pøn jam tsinaadyip Macedoniit jøts jam Acayit etjotp. ⁸ Jade'ents idø'øn ja Dios y'øgyajpxy ja y'ømyadya'aky tø xyikwa'kxiyidi, jøts kidi jamyip meets ja jade'en nugo tø xuñ Macedonia uk jam Acaya, yikniǰa'wip yø o madsoo jøts ku meets ja Dios amuum xjanchjawi. Ti sa øø njaakwa'ant, ti øø njaaknikyajpxp. ⁹ Ja'axi ja kø'øm tmadyaktip jøts ku øøts jam ojts n'øch ma meets jam jøts y'øyja'widip ja' sa meets jam ojts xkupiky, jøts øy ja yikxon tñimadya'akti sa mee xmajststuupty ja'abi winmaa'ñ midí ja Dios kyaja'ajip, jøts ku ja Dios tu'ugyi tø xpabøjkpínaxwa'akti pøn xemikøjxp ejtp, pøn tu'ugyi Dios'ajtp. ¹⁰ Jøts ñayíñimadyaktip ja nayide'en sa meets nwindson'ajtim Jesús xjöp'ixy jøts ku ja jadigojk wyimbett jap tsajpjøtpy ja Dios U'nk, pøn ja Dios Teety tyikniwaajts ja ol'jkin jøts ja tyikjujkyijky. Ja'ats adøm idø'øn xuknitso'ok'ajtindip ja' ayo'on midí memp midí

wingomp.

2

Sa ja Pablo kyajpxwa'kxy jam Tesalónica

¹ Mnija'widipts migu'uk ja'adi, jøts ku øøts jam n'ats'øjch mā meets jam, ka'ap øøts ja nxøøw nugo wyindigøøy. ² Øy øøts jam wyinaty Filipit kajpkøjxp tø nyikjemduñ, mnija'widipts ja wā'ats jøts ku øøts ja Dios tø xjanchpudøki jøts øøts ja kyajpxy jøts øøts ja y'ayuujk ja tø nyiknajxyi amumjoojt midi xyiknitso'ok'ajtindip, jøts meets ja tø myiktukmadøy yam idø'on ja tsep yjanchjatuñi. ³ Jøts ka'ap øøts ngajpxigøy ti jaty øøts ojts ngajpxwa'kxy, jøts kidi wenk winmaa'ñip øø njagyeypy ku øøts jam jade'en ojts ngajpxy jøts nika' myikwin'øøndi. ⁴ Pø tiy'ajtinxi yø', tøxi ja Dios kø'øm tyikutuky jøts øøts ja tø xanipiky ja kyajpxy ja y'ayuujk midi yiknitsokp, jøts jade'ents øøts ja tø ngajpxnaxy. Jøts ni ka'ap øøts ja n'ixa'ay jøts øøts ja kuwani ndyimyikta'øy'ext uk ndyimyiktakajxa'akt, pø ja Diosxi yikmidump jøts ja'ats tu'uk tu'uk t'ejxp sa jaty pøngapøn yjaa'y'aty. ⁵ Jøts mnija'widipts ku øø ka' nugo ngajpxy sa jaty ojts myiknøjmidi jøts nigidi taayip øø n'ixaapy sudso øøts ja meen nbøkt. Ja Dios yø tnija'wip jøts ja' yø t'ejxp. ⁶ Niwindii øø ngawa'añ jøts øøts ja jaa'y xwindsø'øgit, wan meedsi uk øy tyimyjapøni. Xpaat'ajtpimts øøts, øy øøts ja jeexyip jade'en tø nduñ jøts meets jeexyip ja nwindson'ajtim Jesús kyutujk møk'ampy tø ndanipiky, pø ja'axi øø nbadumpy. ⁷ Ka'ap øøts jade'en tø n'adi'ich; øy yikxon mee tø

nm̄iyujy'aty sam ja u'nktaak tyikyee ky tyiktsø'øky uk t'eix'ity ja y'u'nk ja y'una'jk. ⁸ Njanchøjkpy meets mjanchpa'ayøøpy meets, jade'en pyaat'aty jøts øøts jeexyip ka'ap ja Dios kyajpxy ja'ayi nugo tø nyajkiyi, ngu'o'jkippaat meets jeexyip ja'agøjxp ku ndsokti ja'agøjxp ku nba'ayowdi. ⁹ Mee migu'uktøjk, wa'ats inet xja'myatsti sa øøts y'ijty nduñ nbiky, sa øøts nnamyiw̄inmaa'mbyaadyi jøts øø nbaaty ja nidsinaajyk. Ku øø nduñ xinaxy tsunaxy, ngamaa'y nga'ity øøts, jøts jade'en ka'ap myik'adsepti ku myikmo'odi jade'en ja Dios y'øgyajpxy ja Dios y'øy'ayuujk.

¹⁰ Mee nagyø'øm mnija'wip jøts møøt ja Dios, jøts ku ka' ti tundigø'øyin myiktu'unxidi. Yikxon øø njaa'y'aty jøts øøts jade'en ka' ti pøky xaja'aty øy øø pøn xjapøky'eixwa'añ. ¹¹ Jøts mnayi mnija'widip nayide'en sa nidu'uk jaty tø myik'ayo'ejxti ku myikajpxjot'amøjkidi, jade'en sam ja jaa'y ja ty-eety yjagyepyyi. ¹² Tøxi myiktukmadowdi jøts ku øy yikxon mjaa'y'attit sam pyaat'aty pøn ja Dios ja'ajtidip, pø ja'axi kø'øm wamp jøts meets ja mdaniwaadsowiyi ja kyutujktaajk mā ja amuum xyiktuujnidit ja myøk'ajtin, ja y'øy'ajtin jøts ja xyondaajkin.

¹³ Ja'agøjxpts øøts idø'øn ja Dios ja ndukmøjaw̄i ndukunuu'kxyjaw̄i ku meets ja kyajpxy ku meets ja y'ayuujk ja ojts xmadojiyi midi mee ndukmadoow. Ojts ja xjanchkupøkti jade'en jøts ku ja Dios ja tja'aji, kidi nugo jaa'yipxi ja' yja'. Jøts janch tiy janchts idø'øn ja', jøts ku ja Dios ja tkajpxyi jøts ku ja Dios ja t'ayuujki, jøts ja mbudøkiyidi pøn

jaty ja tjanchja'widip. ¹⁴ Mee migu'ukti, ku tɔ xku'ayo'ombaadiidi ja Dios, kawine'en ja mmigugajp tɔ mdagubetyidi, nayide'en tɔ mjatti sam ja jaa'dyi pɔn ja Dios tjanchja'widip pɔn ja nwindson'ajtim Jesucristo tjanchja'widip pɔn tsinaadyip jam Judea, pɔ nayide'enxi ja tɔ yjatti, nayide'en ja myi'israelit jaa'y ja kyamee'kxyidi. ¹⁵ Yɔ'ɔbi israelit jaa'yts idɔ'on tyik'oo'ktɔɔ ja nwindson'ajtim Jesús. Nayide'en ttungojmidi sam ja tɔ tyik'ookti ja kyɔ'ɔm migu'uk pɔn jaty ja Dios kyugajpx'ajtpy, jɔts ɔɔts ja tɔ xpawɔpy. Niwine'en ja Dios ja tkayikjotkujk'atti jade'en, jɔts yjanchtumwenk'ejxtip ja jaa'y ɔy pɔn, ¹⁶ jɔts ku ɔɔts ja Dios yja' njadukmadoowa'anmiyi pɔn ka'israelit jaa'dyi jɔts ja ñits'o'oktit, ka'ats ɔɔts ja jade'en xuktunwami. Xjats jade'en ja pyɔky nugo tyikmiweni'adɔ'ɔtsti. Ixyamnims inet ja Dios ja mɔk ayo'on tɔ tyuktagida'agidi.

Ku ja Pablo ɔy tjapaatwa'añ jadigojk ja Tesalónikit jaa'y

¹⁷ Mee migu'uktɔjk, ku ojts nnawya'kxyindi jɔts waani ñajxy ja et ja xɔɔw, nja'myajts'ijtpyim meets ɔy mee njaga'ijxy jɔts ɔɔts njanchja'atsnɔjkxwa'añ kawinaak ojk jɔts mee n'ats'ext. ¹⁸ Ojts ɔɔts njadyimya'uktsɔɔñ; ɔts meets jam kɔ'ɔm kawinaak ojk tɔ njadyimy'ats'ejxwa'añ, jatyi jatyits ɔɔts ja miku' xyiktuu'duky jɔts ɔɔts jam nganijkxy. ¹⁹ Jɔts tigɔjxp ɔɔ nxonda'aky, ti ɔɔts idɔ'on ndaxondakpy, ti ɔɔts idɔ'on njɔp'ijxpy, ti ɔɔts idɔ'on ndajotkujk'ajtpy, pɔ meetsxi dɔ'on ndajotkujk'ajtpy ku mye'ent ja nwindson'ajtim

Jesucristo. ²⁰ Meetsxi dø'ø̄n ndajotkujk'ajtpy ku øø nxonda'aky.

3

¹ Jade'en'ampy øø tø nwinmay jøts øø nda'ant yam Atenas kajpkøjxp ku øø ka' n'ukmajada'kni, kumi ka' øø n'ukmidanaañi jadine'en ja jotmay, ² paty øø tø nguexy tu'uk ja nmigu'uk pøn jam tø m'ats'ijxyidi. Timoteo øøts nguexy, ja'axi ja Dios tmidump jøts ejtp øøts ja tø nmøøtuñ ku øøts ja nwindson'ajtim Jesucristo y'øgyajpxy ja y'øy'ayuujk tø ngajpxwa'kxiyi midi ja nitso'ok'ajtin tyajkp, ja'ats mdukmadowidip jøts ja mgajpxjot'amøjkiyidit jøts ja m'ajot'ajtin tu'ugyi xyik'ettit, ³ jøts jade'en ka' pøn t'ixmatst øy idø'ø̄n ja tsep jade'en y'ity. Wa'atsxi kø'øm xnijawidi jøts ku jade'en ja ayo'on nbaajtindit. ⁴ Jøts ku øø nay jam wyinaty møøt meets, ojtsxi øø nnigajpxy jøts mee ndukmadøy jøts ku n'amjajtindit ndsaachjajtindit; tøts xnijawidi jøts ku jade'en tø yjanchjaty. ⁵ Paty øts, kumi ka' øts jadine'en n'ukjotkujk'ajtni, ja'agøjxp mee tø ndaniguexy ja jaa'y jøts ja tyiktø'øt sa ja mjanchja'win xyik'etti, ja'ats ø ndsø'jkip uk wan meets ja miku' tø mduktuñidi ja yja' jøts jeexyip ja Dios kyajpxy jade'en nugo ñiwyindigøy sa meets ja ojts njadukmadøy.

⁶ Tøts ja Timoteo wyimbity jam Tesalónica jøts ja yam tø tmija'aty ja kajpxy ja ayuujk midi yikjotkujk'atyim jøts ku meets ja janchja'win møj xjagyepy jøts xyiktuujnidi xem yam ja Dios chojkin. Yide'ents ja yam wya'añ jøts ku meets ejtp xja'myech, jøts ku nayide'en ja tsojkin xjagyajpti jøts øø xjapaatwa'añ nayide'en sam

mee nja'ejxwami. ⁷ Ñiyjot'amøkpxjokp øø migu'uk yjawí, ku øø nnimadøy jøts ku tu'ugyi ja Dios xjanchjawidi, yam øøts idø'øn yjawí yide'en tsep'agujkpy njaty. ⁸ Ku øøts jade'en nnimadøy jøts ku ja Dios tu'ugyi amumjoojt møøt m'etti, jade'en øø nnayjawíyi tyimxyajimbejtp øøts yjawí. ⁹ Ku meets jade'en xuñ, øy øøts ja Dios møj njanchtamøjawí ku meets jade'en xpadundi ku jade'en xwindsø'øgidi ja Dios. ¹⁰ Xjats øøts yide'en xinaxy tsunaxy ja Dios n'amidøy jøts mee ndyimy'ats'ext, kø'øm ndyimy'atspaattit, jøts ka'pxy myiktukmado'odit ti jaty mjaaka'ejtxidip jøts ja mjanchja'win tu'ugyi t'ettit.

¹¹ Ja' øø ndsøjkpy jøts øøts ja Dios Teety, jøts øøts ja nwindson'ajtim Jesucristo xpudøkit jøts øøts jam nnøjkxt jøts jam m'atsyik'ejxtit. ¹² Nay ja Diosts myikmøjta'agiyidip ja mwinmaa'ñ jøts ja tsojkin møj xjagyaptit nixem niyam, jøts xminamyayidit øy pøn møøt nayide'en sam mee myiktsoktin sam meets ja tsojkin ndamijagyapi. ¹³ Nay ja Dios Teety mmo'ojidip ja myøk'ajtin jøts xmidanidit ku sa mjattit, jade'ents ja mja'bikyidi jøts mgapøky'ijxyidi ku ja nwindson'ajtim Jesús jadigojk mye'ent møøt niduki'iyi pøn jaty ja Dios ja'ajtidip.

4

Sa ja Dios xajotkujk'ajtin

¹ Ixyamts øø migu'uk nnigajpxy jøts mee myiktukmadowdi ja nwindson'ajtim Jesús y'ana'amingøjpx: jøts ku jade'en xun'ettit sa øøts ojts nyik'ixpiky jøts ku mdsøønidit mdanidit

jade'en sa ja Dios ttajotkujk'aty. Tun'ettits meets ja jade'en.

² Mnija'widipxi ja ana'amín midí myikmøødyi, midí øø tø nnigajpxy ku jade'en tyikutuky ja nwindson'ajtim Jesús. ³ Ja' Dios chøjkpy jøts ja tu'ugyi xnadyamiyoxidit; jøts kidi nugo mnamyøøt'atyidi põni ka'adam ja xniyaa'yidi põni ka'adam ja xnidø'øxyidi, ⁴ ku pøn y'amajtskiwya'añ, ka'ap ja patki'iyi nipøn tø'øxyøjk tkamøøt'att. Ja' øy wa'aats pidsømp jøts ja jade'en kø'øm ñawyindsø'øgiyi. ⁵ Jøts kidi nugo mbøkti ku mnachuj'ijxyidi ja'ayi sam ja jaa'y y'adi'ichin pøn ja Dios tkanija'wip. ⁶ Kidi pøn ja myigu'uk ñidø'øxy twin'øø'nidi, møk nwindson'ajtim mdagubatidit, pø tøxi øø nnigajpxy. ⁷ Ja'ats adøm ja Dios tø xanibiktaajka'am jøts adøm øy tsuj njaa'y'ajtindit. Ka'ap ja jade'en wya'añ ja Dios jøts ja kya'øyi ndu'unint. ⁸ Jade'ents idø'øn, põni pøn yø'øbi xpøjkin tkamøjpiktakp kidi myigu'ugip ja jade'en wyinaty tyumpy, ja Dios idø'øn ja wyinaty jade'en kyamimadøøpy, pøn adøm ja y'Espíritu Santo tø xmø'øyim.

⁹ Wine'en ja tsojkin wine'en ja namya'ayin xem yam, ka' øts ja ngajpxwa'añ. Ti ja øts ja nugo njaañit, pø tøxi Dios kø'øm mdukjatyidi jøts xem yam mnamyayidit mnachokidit. ¹⁰ Ejtp meets ja mmigu'uk jade'en xminamyayi pøn ja Dios tjanchja'widip jam Macedonia. Ja'ayi ø nugo nnigajpxy jøts ja n'øyjaa'y'ajtin møk xjaakyik'awa'andit, jøts myøjit ja m'amigu'uk'ajtindi. ¹¹ Øy jotkujk idø'øn mdsøønidit mdanidit, ja mdunk ja mbøjk ja'

idø'n mjetmay'attip pø jade'enxi øø nxumiwa'añ,
 12 jøts ja abikpyi jaa'y mwindsø'øgiyidit jøts kidi ti
 mga'ijtxyidi.

Sa ja nwindson'ajtim jadigojk mye'ent

13 Mee migu'utøjk, ka'ap øø ndsøky jøts jadi'iñi
 mda'andit, ni xkanijawidinim sa yjatt añmi'oo'kpi,
 jøts kidi jade'en mjetmay'oockti sam jadu'uk yjot-
 may'oocktin pøn ka' ti awejx'ajtin tjagyapti, pøn
 tkanija'widip ja Dios. 14 Pøni nmibijkyimts adøm
 ja Jesús ku ja tø y'øøky jøts ku ja tø yjukpyiky
 jadigojk, sudsots adøm ja ngamibøjkim jøts ku ja
 Jesús jadigojk wyimbett ku ja Dios Teety ja møøt
 tyikjukpyøkt ja añmi'oo'kpi pøn jaty ja wyinaty tø
 y'atsjanchjawiyidi.

15 Paty idø'n myiktukmadowdi nwindson'ajtim
 y'ixpøjkingøjxp, jøts ku adøm, pøn jaty wyinaty
 juky'ajtipnim ku ja nwindson'ajtim mye'ent,
 kidi adømip tyimyjawyenygyojindip jøts
 nika'aninim ja' pøn tø y'oockti. 16 Pø kø'ømnimxi
 ja nwindson'ajtim kyida'akt jam tsajpjotp jøts
 ja kyajpxt kyutujkingøjxp, jøts ja kyajpxt sam ja
 møj ankilis, jøts ja pujxuujx ja tyiktu'unt midi
 ja Dios yja'ajtpy. Winetnimts ja yjukpyøktit
 jawyeen pøn tø t'atsjanchjawidi ja Cristo, pøn
 tø y'oockti tyigøydi; 17 jøtsnim adøm pøn juky
 tandipnim jaanimts adøm ja møøt nnøjxindit
 yootsjøtpy ma ja nwindson'ajtim nminabyaajtindit
 jam tsajpwemp. Jøts ja nwindson'ajtim
 jade'en xemikøjxp nmøøtjuky'ajtindit. 18 Paty
 mjadyimñagyajpxjot'amøjkiyidit xem yam, yø'øbi
 kajpxy yø'øbi ayuujk myiktu'undip.

5

¹ Migu'uktøjk, ka' chøkyi jøts ø nja'at ti xøøw ti jumøjt mye'ent ja nwindson'ajtim. ² Wa'atsxi meets ja xnijawi jøts ku ja nwindson'ajtim yja'att jotmøn tu'ukpi xøøw, yam ja wyinaty ka'ap pøn tjøp'ixy. Jotmøn ja mye'ent sam ja maa'tspi koots y'atsmiñ. ³ Ku jaa'y wya'andit: "Jotkujk ixyam, ka' ti tyuñi, ka' ti kumay", winets ja jotmøn tyaja'atpatidi jøts ja ayo'on myo'ojidit møk, jade'en tyaja'adidit sam ja tø'øxyøjk y'u'nkpikyin pøn ja y'u'nk tnikøxp'ajtp jøts niwine'en ja chookin ja tkapaattit. ⁴ Jøts meets migu'uktøjk, ka' meets mwimbeeds i mgugoodsi. Me'emp ja juuni xøøw ja nwindson'ajtim jøts ka' nugo jotkumoni mbaadiyidit ejxim ja jaa'y adsu'jky yikwimeech. ⁵ Pø Diosxi mjagyajpidip jøts adøm wimbeets kugoots nga'ijtyindi. ⁶ Paty ka'ap jade'en nugo njotmo'onidit sam jadu'ukpi y'adø'øtsta'an, njøp'ejxindip idø'øn ja' wijy kejy. ⁷ Pøn nugo najtspøki ejtp, ja wimbeets'ajtin ja kugoots'ajtin ja yikmajadakpy; jøts pøn mujkip kujxip, nay ja' ja yikmajadakpy. ⁸ Jøts kujaji kudøø'kxi adøm, patyts adøm ejtp wijy kejy n'ejtindit. Kuwani njanchja'windit amumjoojt ja Dios yja' jøts nnachojka'andit nnamyajya'andit. Jade'en idø'øn nnadyagubojka'andit ja Dios yja' ejxim ja soldadi ñadyagubøkyan ja pyujx jøts ja nisa kyajaty. Jøts njøp'ejxindip adøm ja nitso'ok'ajtin, jade'en idø'øn ja ñamyayi tpaaty sam ja soldadi pyujxkujup midi ja kyubajk ja adanaajyiyip. ⁹ Pø kidi ja'ajipxi adøm ja Dios tø xanibiktaajka'am jøts adøm n'ayo'ombaaajtindit, pø ja'axi ja chøjkpy jøts adøm ja øy'ajtin nitso'ok'ajtin nbaajtindit

nwindson'ajtim Jesucristo køjxp. ¹⁰ Adømxī ja nwindson'ajtim Jesucristo tō xku'o'jkindi jōts adøm ja mōøt njujky'ajtindit. Nbaajtimpxi ja' xemikøjxp øy njadyimyjajujky'ajtyindinim uk øy wyinaty tō njadyimya'o'jknandi. ¹¹ Paty jotmøk mnabyikta'agidit jōts xem yam mnabyudøkiiyidit sam ixa mmendi mbatti.

Ku ja Pablo ja jaa'y tkajpxwiyj pøn tō tjanchjawidi ja Dios

¹² Migu'uktøjkti, ndukmadooip ixyam jōts waani xwindsø'øgidit pøn ttundip mā meets jam, pøn jam nduu'møøjyidip, pøn jam mda'ana'amidip ja nwindson'ajtim yja'. ¹³ Øy tsuj xaxonda'aktit ku jade'en tyundi, yiktundi ja tuda'aky'ajtin, yikxon namyiyujy'atidi nixem niyam.

¹⁴ Jōts nayide'en migu'uktøjk ndani'ana'amdi, jōts xukja'gyukidit pøn katunwandip, kajpxjot'amøjkidi pøn yø'øbi tkadajotkukidi ku ja yikjemandi yiktedundi, pudøkidi pøn waani jot'amutsk'ajtpnim jōts tuda'aky mjaay'y'attit øy pøn mōøt.

¹⁵ Øyim mnay'ejxidit jōts kidi pøn nayide'en ttuñ ja myigu'uk sam ja tō kyayik'ødyuñin. Tum ja y'øybi ne'egi ejtp mdu'undip. Øy xwindsø'øgidit ja mmigu'uk nixem niyam jōts nayide'en øy pøn mōøt.

¹⁶ Øy jotkujk m'ettit. ¹⁷ Ajot'at'etti ja Dios Teety. ¹⁸ Pøni ti jaty tuujnip, tukmøjawidi tukunuu'kxyjawidi ja Dios, yø' ja Dios chøjkpy jōts meets jade'en xu'unt pøn jaty tjanchja'widip ja nwindson'ajtim Jesucristo.

¹⁹ Kidi ja Espiritu Santo xyiktuu'dujkidi ja myøk'ajtin midī meets ja mdunwa'anxiyip

mjujky'ajtingøjxp. ²⁰ Jøts kidi xkagupøkti ja mmigu'uk pøn amuum kunuu'kxip ja Dios jøts ja tkajpxi ja Dios y'øgyajpxy ja Dios y'ømyadya'aky. ²¹ Yikxon tuki'iyi x'uk'ejxtit, jøts midi øy, ja'ats mbaajtidip. ²² Ixmajtskøxti ja kya'øybi.

²³ Jøts nay ja Dios, pøn ja jotkujk'ajtin tyajkp, nay ja' wa'ats myik'ejtxiyidip ja mjaa'y'ajtindi kunim ja nwindson'ajtim Jesucristo wyinaty myiñ. ²⁴ Pø tøxi ja Dios mwi'ijxyidi, jøts tiy janch ja wya'añ jøts tuki'iyi ja jade'en ttungøxt sa ja tø wya'añ.

Ku ja Pablo t'ukajxpoo'kxni ja myigu'uk

²⁵ Migu'uktøjkti, ni'amido'owik øøts, nibøktso'owik øøts.

²⁶ Yiknajxidik øøts ngajpxpoo'kxin jøts ja mmigu'uktøjk xkajxpoo'kxtit sam ja Dios tsøkyin.

²⁷ Jøts nayide'en ndanipøkti Dios y'ana'amingøjxp, jøts ya'at nøky xukmado'odit niduki'iyi ja mmigu'uk pøn ja Dios tjanchja'widip.

²⁸ Mgunuu'kxidip ja nwindson'ajtim Jesucristo. Jade'en idø'on ja yjatt.

**Ja ɔgyajpxy ja ɔmyadya'aky midi xukpaajtimp
ja nitso'ok'ajtin
New Testament in Mixe, Tlahuitoltepec
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

422dcf73-46a5-5403-b423-8406ed76ac1d